

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine FBiH”, broj: 49/06 i 51/09), člana 7. Zakona o pečatu Federacije Bosne i Hercegovine („Službene novine FBiH”, broj: 2/94, 21/96 i 46/07) i članova 9. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo” broj: 20/13), Općinsko vijeće Stari Grad Sarajevo na 9. redovnoj sjednici održanoj dana 28.10.2021. godine, donijelo je

**ODLUKU  
O PEČATIMA  
OPĆINE STARI GRAD SARAJEVO**

**I - OPĆE ODREDBE**

**Član 1.  
(Predmet Odluke)**

Ovom Odlukom uređuje se statusni značaj pečata, pečata za otisak u vosku, suhog pečata i štembilja, koji su u upotrebi u Općini Stari Grad Sarajevo (u daljem tekstu: Općina), utvrđuje se pravo na posjedovanje i korištenje istih, određuje se njihov oblik, veličina i sadržaj, te se uređuju pitanja izrade, upotrebe, čuvanja, evidencije, uništenja pečata i druga značajna pitanja vezana za pečate Općine.

**Član 2.  
(Statusni značaj pečata)**

- 1) Pečatom se potvrđuje autentičnost akata, koje u okviru zakonom utvrđenih nadležnosti donose organi vlasti Općine i općinske službe.
- 2) Pečat se stavlja lijevo pored potpisa službenog lica ovlaštenog za potpisivanje službenih akata, ako Zakonom ili drugim propisom nije drugačije određeno.
- 3) Pečatom za otisak u vosku se potvrđuje da je zapečaćen poslovni prostor ili stambena jedinica, sa kojima raspolaže Općina, a u okviru Zakonom propisane procedure.
- 4) Suhim pečatom se potvrđuje autentičnosti nagrada, priznanja i zahvalnica, koje dodjeljuje Općinski načelnik.

**II – PRAVO NA POSJEDOVANJE I KORIŠTENJE PEČATA I ŠTEMBILJA**

**Član 3.  
(Pravo na pečat)**

Pravo na pečat imaju:

- Općinski načelnik;
- Općinsko vijeće Stari Grad Sarajevo;

- Službe/sektori/zasebne organizacione jedinice unutar jedinstvenog općinskog organa uprave;
- Mjesne zajednice;
- Javne ustanove, preduzeća i druga pravna lica kojima je Općina osnivač.

### **III – OBLIK, VELIČINA I SADRŽAJ PEČATA**

#### **Član 4. (Oblik i veličina pečata)**

- 1) Pečat ima oblik kruga i prečnik 50 mm.
- 2) Organi i općinske službe iz člana 3. ove Odluke, koje imaju pravu na pečat pored pečata prečnika 50 mm, mogu imati i pečat oblika kruga prečnika 30 mm.
- 3) Pečat za otisak u vosku ima oblik kruga i prečnik 30 mm.
- 4) Suhi pečat ima oblik kruga i prečnik 60 mm.

#### **Član 5. (Sadržaj pečata)**

- 1) Pečat u prvom koncentričnom krugu sadrži sljedeći tekst: “Bosna i Hercegovina – Federacija Bosne i Hercegovine”, u drugom koncentričnom krugu sljedeći tekst: “KANTON SARAJEVO – GRAD SARAJEVO – OPĆINA STARI GRAD SARAJEVO”, u trećem koncentričnom krugu naziv organa ili službe, dok je u sredini grb Općine Stari Grad Sarajevo.
- 2) Ukoliko se pečat opisan u stavu jedan ovog člana koristi za određenu službu/sektor unutar jedinstvenog općinskog organa uprave, u trećem koncentričnom krugu je pored naziva službe ili sektora sadržan i tekst “OPĆINSKI NAČELNIK”.
- 3) Ako organi i službe iz člana 3. ove Odluke imaju više pečata oblik, veličina i tekst moraju biti istovjetni, te svaki takav primjerak mora biti označen rednim brojem.
- 4) Tekst je ispisan latinicom na bosanskom jeziku.

### **IV – IZRADA PEČATA**

#### **Član 6. (Izrada pečata)**

- 1) Izrada pečata, na osnovu zahtjeva podnesenog u skladu sa odredbama ove Odluke, odobrava se rješenjem Općinskog načelnika.
- 2) Općinski načelnik će rješenjem odbiti zahtjev za izradu pečata kada ustanovi da podnosilac zahtjeva nema pravo na pečat ili ako je zahtjev suprotan odredbama ove Odluke u pogledu sadržine, veličine i broja primjeraka pečata.
- 3) Primjerak rješenja o odobrenoj izradi pečata dostavlja se nadležnom organu unutrašnjih poslova.
- 4) Izradu pečata vrši pečatoreznica izabrana u postupku provedenom po odredbama važećih propisa o javnim nabavkama.

## **V – UPOTREBA I ČUVANJE PEČATA**

### **Član 7. (Upotreba pečata)**

- 1) Pečatom rukuje i upotrebljava ga shodno njegovoj svrsi Sekretar organa državne službe, pomoćnik načelnika ili drugo službeno lice iz organa i službi navedenih u članu 3. ove Odluke, kojeg posebnim rješenjem ovlasti Općinski načelnik.
- 2) Pečatom Općinskog vijeća rukuje i upotrebljava ga predsjedavajući Općinskog vijeća, odnosno po njegovom ovlaštenju rukovodilac Stručne službe vijeća Općine Stari Grad Sarajevo.
- 3) Pomoćnik načelnika može unutar službe kojom rukovodi ovlastiti šefa odsjeka ili sekretara mjesne zajednice za upotrebu pečata, a za čiju je upotrebu isti ovlašten od strane Općinskog načelnika.

### **Član 8. (Čuvanje pečata)**

- 1) Pečat se mora čuvati i upotrebljavati tako da se onemogući njegova zloupotreba.
- 2) Svaka službena osoba koja je ovlaštena za upotrebu pečata obavezna je isti čuvati u metalnoj kasi, koja je osigurana ključem, te je odgovorna za oštećenje ili gubitak istog ukoliko ne čuva pečat na način predviđen odredbama ove Odluke.
- 3) Pečat se čuva i upotrebljava u službenim prostorijama, izuzetno, pečat se može koristiti i van službenih prostorija. Upotrebu pečata van službenih prostorija odobrava Općinski načelnik.

## **VI – UNIŠTAVANJE I NESTANAK PEČATA**

### **Član 9. (Uništavanje pečata)**

- 1) Općinski načelnik rješenjem imenuje Komisiju za uništavanje istrošenih i neupotrebljivih pečata, koja broji tri člana.
- 2) Zahtjev za uništenje pečata, uz saglasnost Općinskog načelnika prema Komisiji za uništavanje istrošenih i neupotrebljivih pečata podnosi službeno lice, koje je i ovlašteno za upotrebu i rukovanje pečatom čije uništenje predlaže.
- 3) O uništenju pečata sačinjava se zapisnik koji sadrži mjesto i datum uništenja, broj komada pečata, otisak pečata, naziv organa i službe čiji su pečati uništeni i način uništenja.
- 4) Gumeni pečati uništavaju se spaljivanjem, a pečat za otisak u vosku i suhi pečat uništavaju se mehaničkim putem tako da se u potpunosti uništi tekst pečata.
- 5) Pečat se smatra istrošenim kada se ne vidi jasan tekst na njegovom otisku.

### **Član 10. (Nestanak pečata)**

- 1) Lica koja su ovlaštena da koriste pečat su dužna odmah prijaviti nestanak pečata Općinskom načelniku, te nadležnom organu unutrašnjih poslova Kantona Sarajevo i nestanak oglasiti u Službenim novinama Kantona Sarajevo.
- 2) U slučaju naknadnog pronalazačenja pečata, isti se imaju uništiti na način i po postupku utvrđenom u članu 9. ove Odluke.

- 3) Novi pečat koji se izrađuje umjesto nestalog prema proceduri utvrđenoj odredbama ove Odluke, mora biti posebno označen.

## **VII – EVIDENCIJA PEČATA**

### **Član 11. (Evidencija pečata)**

- 1) Evidenciju izrađenih pečata vodi Komisija za evidenciju pečata, u sastavu od tri člana, koju posebnim rješenjem imenuje Općinski načelnik.
- 2) Evidencija izrađenih pečata obavezno sadrži:
  - broj i datum rješenja kojim se odobrava izrada pečata;
  - broj izrađenih pečata;
  - otisak izrađenih pečata;
  - podatke o osobi, kojoj se pečat predaje na upotrebu;
  - datum predaje pečata na upotrebu;
  - podatke o osobi kojoj je pomoćnik načelnika dao ovlaštenje za upotrebu pečata (šef odsjeka ili sekretar mjesne zajednice);
  - podatke o nestanku ili uništenju pečata;
  - sve promjene vezane za ovlaštenje za upotrebu pečata;
  - potpis ovlaštene osobe za upotrebu pečata;
  - druge relevantne podatke.
- 1) Evidencija iz stava 2. ovog člana se vodi u posebnoj knjizi evidencije, na posebnom obrascu. Knjiga evidencije mora biti tvrdog uveza, numerisanih stranica, protokolirana i potpisana od strane Općinskog načelnika.
- 2) Podaci iz stava 2. ovog člana u knjigu evidencije unose se hemijskom olovkom čitkim rukopisom.
- 3) Pogrešno upisan tekst u evidenciji precrtava se tankom horizontalnom linijom, tako da ostane čitljiv tekst koji se križa, dok se iznad iste upisuje ispravan tekst, koji se ovjerava potpisom člana Komisije iz stava 1. ovog člana.

## **VIII – UPOTREBA ŠTEMBILJA**

### **Član 12. (Upotreba štembilja)**

- 1) Općinski organi i općinske službe u okviru utvrđenih nadležnosti koriste štembilje.
- 2) Odredbe ove Odluke se na adekvatan način primjenjuju i za upotrebu, čuvanje, uništenje i evidenciju štembilja.

## **IX - PRELAZNE I ZAVRŠNE ODREDBE**

### **Član 13.**

Pečati koji su do sada bili u upotrebi, a nisu navedeni u ovoj Odluci, stavljaju se van upotrebe. Uništavanje takvih pečata izvršit će se u skladu sa odredbama člana 9. ove Odluke.

#### **Član 14.**

Danom stupanja na snagu ove Odluke prestaje da važi Odluka o pečatima, broj: 02-02-01/98 od 10.02.1999.godine („Službene novine Kantona Sarajevo”, broj 2/99), kao i Pravilnik o čuvanju i upotrebi pečata, broj: 01-05-110-1840/09 od oktobra 2009.godine.

#### **Član 15.**

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI  
OPĆINSKOG VIJEĆA STARI GRAD SARAJEVO**

**dr.sc. Mirza Batalović, dipl.el.ing.**

Broj: 02-45-630/21  
Sarajevo, 28.10.2021. godine